

江寧府志

漢書門			
類	號	函	架
三	九	一	八
二	九	八	八
四	八	八	八

內閣文庫		
類	號	冊
漢	三	三
齊	四	九
六	八	八
架	八	八

內閣文庫	
漢	2398
冊數	48 (33)
函號	292 14

本三

0 1 2 3 4 5 6 7 8 9 10

A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale

G Y M

© Kodak, 2007 TM: Kodak



江寧府志卷之二十三

人物傳四

大學東
校典籍
局之印

淺草文庫

吳唐固字子正句容人也父翔為丹陽太守因家焉固

修謹博通文史吳主權甚重之見固輒斂容陸遜張

溫駱統皆拜固其為名流宗尚如此黃武間位僕射

所著有國語公羊穀梁傳註時方尚攻伐謀勇而固

獨以儒自業講授常數十人

晉葛洪字稚川句容人少好學家貧躬伐薪以買紙筆

夜輒寫書誦習以儒學知名性寡欲無所愛翫不知

棋局幾道擣菹齒名為人本訥不好榮利閉門却掃

未嘗交游時或尋書問義不遠數千里崎嶇冒涉期於必得遂究覽典籍尤好神仙導養之法從祖元以其術授鄭隱洪就隱學悉得其法焉兼綜練鑿術凡所著撰皆精覈是非而才章富瞻晉太安中石冰作亂吳興太守顧秘起兵討之檄洪爲將兵都尉攻冰別率破之遷伏波將軍冰平洪不論功賞徑至洛陽欲搜求異書以廣其學洪見天下已亂欲避地南土乃叅廣州刺史嵇含軍事及含遇害遂停南土多年征鎮檄命一無所就後還鄉里禮辟皆不赴元帝爲丞相辟爲掾以平賊功賜爵關內侯咸和初司徒導召補州主簿轉司徒掾遷諮議叅軍于寶深相親友薦洪才堪國史選爲散騎常侍領著作洪固辭不就乃求爲勾漏令帝以洪資高不許洪曰非欲爲榮以有丹耳帝從之洪遂將子姪俱行至廣州刺史鄧嶽留不聽去洪乃止羅浮山著書言黃白之事名曰內篇其餘駁難通釋名曰外篇自號抱朴子因以名書別有所著碑誄詩賦百卷移檄章表三十卷神仙良吏隱逸集異等傳各十卷又抄五經史漢百家之言方技雜事三百一十卷金匱藥方一百卷肘後要急方四卷洪博聞淡洽江左絕倫著述篇章富於班馬

又精辯言元贖析理入微年八十一卒顏色如生世以爲尸解云

許謚句容人少以博學知名仕爲郡主簿王導蔡謨辟從事皆不赴後官至散騎常侍

馬樞本扶風人博洽經史爲當世宗尚邵陵王綸鎮徐州引爲學士甚被知賞太清之難避居茅山以文籍自娛陳文帝徵爲度支尚書辭不赴樞少屬離亂行義人所欽仰凡所居處盜賊輒不犯人爭附之依止常數百家有白燕一雙巢于庭樹甚馴狎春去秋來幾三十年時人以爲異

唐許叔牙字延基句容人貞觀時遷晉王府參軍事弘文館直學士邃於詩禮獻詩纂義十篇御史大夫高智周見之曰欲明詩者宜先讀此子子儒字文舉高宗時爲奉常博士長壽中歷天官侍郎弘文館學士封潁川縣男

劉鄴字漢藩句容人父三復以文章知名少孤母有廢疾三復乞食供養不離左右李德裕觀察浙西辟爲掌書記鄴幼而聰敏童州時便能屬辭德裕使與子共師學德裕廢客游江湖間久之召爲翰林學士歷中書舍人傷德裕以朋黨竄死海上書訟其冤復德

裕官爵世高其義鄴尋以本官領諸道鹽鐵轉運使旋拜禮部尚書同中書門下平章事判度支罷爲淮南鳳翔節度使黃巢亂僖宗西狩鄴追乘輿不及爲巢所得迫以僞命不從爲賊所殺

許淹句容人幼多識廣聞精于訓詁與魏橫公孫模皆以博學名家

宋胡則字子正由進士仕至禮部尚書祥符中監鑄咸平錢有吏匿銅數萬劬捕得繫獄株連甚衆則以身賠償不科其罪全活數百人

凡宋南強句容人多學善屬文隱居不仕以德化鄉里所著有醜醜稿同時王德昇侯蕃者皆以儒術昇至正間屢辟不起蕃通六經文詞過人人以龐德公比之

明孫炎字伯融句容人也身長七尺餘面如鐵色慷慨有奇志博學雄辨所交皆豪傑知名視世儒蔑如也高帝下江南聞炎名召見炎勸帝收攬俊傑與圖大業每與謀多當帝意從下浙東擢知池州府未幾召爲省都事會處州降命耿再成守之以炎爲總裁聽自辟掾吏處州故賊衝環城壁塢相望不受約束炎匹馬入城召州豪長踞堦下諭以順逆禍福曰吾牛

若無自為滅宗計皆叩頭流血誓不敢有二心轉相告語降者屬路炎乃擇精銳為兵即命其豪統之無事皆遣歸農寇來以符召立至時天下擾亂賢者多隱匿不肯出炎訪其名以書招之青田劉基最知名炎為書數千言陳天時人事劉就見炎炎置酒與語論古今成敗詞辨鋒起劉乃歎服曰吾始自以為勝先生今見先生遠矣苗將賀仁德李祐之叛襲炎城中與合勢置炎幽空窖中和之降炎不屈乃以酒饋炎曰以此與公訣炎引滿仰天嘆曰嗟乎丈夫乃為鼠輩擒乎飲酒若卒使解衣炎大罵曰此紫綺裘吾君所賜當服之以死遂見害後追封丹陽縣男處州歲時祀之

戎簡句容儒士多讀書有智識太祖既平陳理簡入見語及陳氏事簡曰主上向敗陳氏於九江其衆既潰何不乘勝直抵武昌而乃引還今雖克之用力多矣太祖曰事有緩急兵貴權宜當陳氏兵敗豈不知乘勝以蹙之顧兵法曰窮寇勿追吾故縱之遣偏師綴其後恐其奔逸料彼創殘之餘喘息不暇豈敢復戰我以大軍臨之故全城降伏一者我師不傷二者生靈獲全三者保全智勇所得不亦侈乎簡大悅服他

日與諸將論用兵因論之曰汝等非不善戰然臨事決機智或不足宜親近儒者前日戎簡所言吾雖非之然當時將校亦有勸我邀之下流而以全師蹙之武昌賊衆可以全獲軍中皆以爲奇謀不知簡亦能言之然皆非吾意也汝等當思之勿以吾不用簡言而遂輕儒者

陳登字從善句容人篤信好古力學慎行文詞高邁宏偉有古人風味元末隱句曲山中明初參贊幕府與孫炎夏煜才名相類所著有西掖稿

居仁字仁恕句容人學問該博德行老成爲鄉里矚目洪武初以儒碩徵入朝與之對奕太祖大喜賜以內醞辭職不就歸隱于家暮年自號瞻菴鄉人以瞻菴先生稱之楊孟載集有懷句曲十友詩仁恕其一也將用文句容人永樂中以儒醫薦官至太醫院判仁宗監國用文與黃淮蹇義等同輔知無不言一日論殺囚數百人用文入朝從容爲言可矜狀上悉宥之上嘗論保和之要對曰在養正氣耳正氣完邪氣無自入焉又嘗問卿于醫效率緩何也對曰善治者必固本急之恐傷其本是以聖人戒欲速也仁宗嘗稱其嘉言足以裨治道學士楊文貞言其所以受知于上

者能隨事獻規不專以醫也卒謚恭靖孫誼中成化二年進士授杭州推官治卓異擢御史風紀肅然著經緯文衡紀行錄石屋閒抄憨翁新錄諸書

曹義字宜之句容人父祖而上世有隱德初領鄉薦卒業胄監選入翰林院讀書喜曰吾得讀未見書何幸如之登永樂乙未進士授編修陞文選郎時朝廷以藩臬重任令在京三品堂上官各舉所知而銓師覈實間有未當義往往執論由是公卿重其風槩正統中陞吏部右侍郎王太宰直喜曰吾有所託矣己巳冬京師戒嚴義分守崇文門核練兵士晝夜防範轉南吏部尚書留務簡約義鎮之以靜百司畏服天順初致仕壽七十六卒賜祭葬

張諫字孟弼句容人上世坐累戍赤水諫性至孝憫父拘於行伍力欲脫之負笈從師不憚險遠既登第爲行人丁母孫氏憂哀毀骨立廬墓三年羣鳥集于壟樹服闋進監察御史奉勅歸省父遘疾日夕侍湯藥衣不解帶者累旬比卒復廬墓三年朝夕悲號芝產墓傍人以爲孝感所致服闋調南道明年陞河南副使巡歷南陽諸郡督屯修河所至有聲成化中召爲順天府尹風力峻整請謁不行屢疏減免買辦差科

小民便之以忤時貴出守萊州久旱禱雨輒應新郡學及東萊祠政聲籍甚召爲太僕少卿以疾卒青溪倪公爲之立傳稱其光宗顯親之孝有志必成強毅敢爲之勇有行必遂忠義許國之誠至老勿渝至今子孫克承其家學云

凌傅字汝弼句容人舉鄉貢端重寡言笑博學強記以文名授象山知縣興學愛民嘗築堤障水民得粒食卒于官民哀號立祠祀之著有鳴蟬稿象山稿

樊繼字景昭句容人由歲貢任江西南康教諭自幼篤學敦尚古道至南康勤於啓迪勢利紛華淡然無爲

與諸生講學一以聖賢期之少保楊士奇薦陞湖廣興國知州毀淫祠崇正學以德化民至於成俗嘗築隄障水以利百姓有虎爲患禱於城隍兩虎自鬪而死正統間致政歸郡人號其所築之隄曰樊公隄湯鶴字用之號鐵翁句容人成化乙未進士授行人陞御史上贊襄弘治疏請御經筵辨內外累數千言凡國家大事抗言之不少讓直聲動天下京師號曰湯殿虎其後萬安嗾言官誣以他事謫戍甘肅蒙恩放回杜門不出以禮自閑簞瓢屢空宴如也

王暉字克明句容人由正德丁丑進士授江西吉安府

推官平反刑獄綽有令聞值宸濠之變王守仁檄從
征勦南昌破贛兵殺傷太甚暉亟請守仁止之所活
凡數萬人以功晉秩大理寺副疏議大禮廷杖幾死
復甦僉江西憲振綱肅紀審賊攸平召貳光祿裁冗
濫正品式至今尚遵行之歷兩京太僕少卿擢巡撫
江西右副都御史惠威綏服吏畏民懷踐敷南北戶
侍有近戚以厚賄賂公爲請莊田拒不聽後以右都
御史督理漕運入爲戶部尚書總督倉場兼理西苑
農事剛介正直忠亮端恪允得大臣之體免歸足跡
不出家無厚積日坐讀書樓與二三老友四五兄弟
詩筒酒杯談笑吟咏而已所著有克齋集

李春芳字子實句容人嘉靖辛卯以詩領鄉薦丁未進
士第一人授修撰歷陞禮部尚書時天潢蕃衍宗祿
歲增乃講求便宜酌其可行者奏上賜名宗藩條例
旣而入閣典機務與徐文貞同心輔政力改分宜所
爲世宗崩同受顧命誅左道錄言官蠲逋負中外欣
然望治又諫止重建翔鳳樓罷太倉羨金罷織造歲
幣所請皆允尋以兩尊人猶在堂疏乞歸養侍奉數
年如一日卒年七十五謚文定曾孫長科博洽謙謹
孝友著聞弟嗣京喬皆從長科受業取科第而長科

偃蹇不遇膺薦舉授廣西懷集知縣生平著述甚富率皆勸善利人之書非徒矜博奧而已嗣京崇禎戊辰進士官御史巡按福建喬中萬曆己未進士初授靈寶奏循良第一歷官陝西巡撫有媚獨齋遺稿

張榜字賓王一字肺山句容人早歲聰穎絕人書史過目成誦每作詩莠落筆如風雨雄談雅謔沁人心肺中萬曆癸卯南闈第二人榜初肄業南雍受知于大司成馮夢禎夢禎高資夙望于酬對多濶略南曹郎嫉其慢已飛章劾之遂移病去榜時在太學舉幡小教場諸生會幡下者千餘人榜獨上疏請冠鐵冠斧鑕殺身以直先生已而得旨許留用由是顯名天下上公車不第生平功名事業並未究其用人皆惜之從孫芳中順治壬辰進士

曹可明字懋德句容人生而穎異天啓壬戌成進士賦性廉潔始爲諸生受知于趙中丞延之西席時居貧約侃然以師道自持終年無所請託中丞心儀其爲人適有大辟求減可千金示意于明明卒不應中丞以此益加敬焉分臬粵西擒獲渠魁賊衆免明宗人營脫明按如法解任之日篋笥蕭然

孔貞運字開仲宣聖裔器度端凝嗜學苦志小試輒冠

曹偶萬曆己未進士廷對第二名授編修天啓中陞中允充講官時璫勢薰灼運守正不阿觸璫忌思中以禍賴簡束素嚴無間獲免崇禎踐祚升國學祭酒駕臨雍進講禹謨上爲傾聽條陳監規著國雍釐剔錄以親老乞假起南禮部侍郎禁游女毀淫祠風習一變轉北吏部以專經補春秋講官援古證今其救陳公子壯劉公宗周皆隨事敷陳上爲轉圜入閣輔政調劑爲多若解山右宗民之激變回鄭公三俊之聖怒止復社二張之逮繫其一二表見者也以病乞歸居建德山中食不兼味居無華屋歲饑施粥乞甚衆甲申聞闖變痛哭臥病親友慰問惟稱述主上聖明諸臣誤國言與淚俱哀詔至縣扶掖起迎未及成禮遂卒年六十九謚文忠

孔夢周號伯海句容人少喜讀史漢及于鱗弁洲諸集博洽多智失售于有司壯遊京師辟事銀臺授陽城縣尉邑常苦旱迺望風占灾搜得旱魃焚之澍雨隨降歲獲以登邑更有豪猾爲大盜窟宅周密令間諜傭作盜家跡其嘯聚行事之人暗以硃塗其衣履逮入市擒之羣盜盡獲邑人至今稱嘉績云

李信字吾斯文定公曾孫由貢生選廣東和平縣尹至

任未幾城破信與其次子及第三子一時俱死一老諸生楊姓者江右人相隨署中曰吾亦江右文學也忍獨生乎亦相繼死有許士楷者亦邑人讀書未成至是七日不食死

漢史崇字伯勤其先杜陵人建武中累官青冀二州刺史封溧陽縣侯天下既平詔公侯皆就封因家焉崇治尚寬簡不威而化卒謚壯侯子顥孫茅世其爵茅除尚書遷侍中轉鎮西將軍雍州牧宰治寬猛適宜時人德之謚曰頃歷晉唐世有封爵至今爲邑巨族唐史務滋崇之裔先爲溧陽侯天授元年以司賓卿進拜尚書武后革命詔務滋等十人分行天下雅州刺史劉行實兄弟爲侍御史來子詢誣其反詔務滋與來俊臣訊之務滋意欲平反俊臣言務滋與囚善掩其反狀后命俊臣并治遂自殺

宋潘祺字長吉溧陽人好學尚氣節遊太學知名與陳諫議東爲友陳欲獻書闕下過祺謀可否祺曰祺親老不能與子俱死子不可不勉東意遂決祺性至孝父疾革露章請于帝願減已壽以益父父疾果瘳登第調宣州司戶卒年三十八里人惜之

劉岑本吳興人遷居溧陽岑博學愛人有古君子風登

進士第累官戶部侍郎以徽猷閣待制致仕

潘彙征字泰初寓居溧陽記問該博宗濂洛諸儒之學登嘉定甲戌進士廷對侃直劉漫塘宰稱其志行兼備薦于朝尹崑山繁昌俱有治績

趙淮字元輔以從父葵賜第溧陽遂家焉德祐中元兵大舉賈似道兵潰沿江守將或逃或降乃就家起淮爲大府寺丞招集義兵造艦于長蕩湖倚岳山置寨以扼東出之兵未幾元兵分道來攻淮戰敗被執口占辭家廟云祖父有功王室德澤延及子孫淮今勢窮被執萬古忠義猶存刀鋸豈所不懼誓以一死報君急告先靈速引庶幾不辱家門見阿木不跪授以虎符不受使往揚州招李庭芝降至則大呼曰庭芝男子死則歿耳阿木怒殺之罵不絕口二妾殉焉有錢應高者溧陽進士淮被執嘗宿於其家聞淮死追之不及亦赴荆溪而歿

元僕列箎本畏吾人居溧陽父哈刺不花死王事列箎中至順庚午進士爲潮陽尹歸過南昌值紅巾亂當事檄守東門城城陷誓不辱挈妻子十一人同日死之後人徙其樓於城西北角曰僕家樓以旌其忠崇禎末南昌府推官立廟祀之

入也吳元年以元故官歸附授兵部員外郎三年改尚寶司丞冊封高麗使回稱旨出知河南府以才幹著累官吏部尚書

徐文英溧陽人幼警敏尚氣節洪武丙子由明經授龍虎衛經歷擢浙江道御史清剛自立一日入朝後期上詰之對曰送臣父歸里爾上問何所贈曰錢一百草屨二緡追驗之良然見其衣肩窶裂命繡窮御史三字於袍上旌之尋轉河南副使寮屬有過輒斥不少容後從英國公征交趾矢竭心力遘病卧營中語人曰馬革裹屍未足報國遂卒英國憐其忠令人與櫬歸葬焉

繆樛字全之溧陽人以進士知東陽縣蒞事剛果奸人憚之邑有隱糧詭寄樛立法丈量以均徭役民德之擢南道御史彈劾不避權貴抗論中官蔣琮語侵汪直天子察其忠殛琮而謫樛莒州判官下車立辨王氏疑獄有神君稱卒於官

史際字恭甫溧陽人少從王公守仁湛公若水遊壬辰舉進士以文選主事改春坊清紀郎旋乞歸置義莊義塾修明倫堂濬躍龍關捐田二百畝資貧士誦讀嘉靖甲午乙未洊饑際發廩以濟更捐粟墾治沙漲

江蘇府志 卷三十三
存活數千人田成名曰救荒渰太倉沿海大水運勸賑穀二萬石抵崇明嘉定等倉甲寅乙卯間倭犯東南際募死士邀擊於邑之舊縣又追禦之於太湖撫按上其功晉尚寶廕子繼書爲錦衣指揮僉事萬曆中倭寇朝鮮繼書請屯田天津爲勦倭犄角之勢會撫事成不果行

馬從謙字益之溧陽人嘉靖十四年進士初任工部主事治河徐梁有能聲轉禮部改尚寶丞掌制誥從世宗幸承天陞光祿少卿兼翰林院五經博士仍典制昔上好道修齋黹日費數千緡中官杜泰怙勢侵冒鉅萬從謙疏止齋醮并暴秦罪擬以誹謗廷杖死之初從謙憤武定侯橫將疏論之以母老懼不測中止甫除母服卽以劾中貴死子有驥以明經官鴻臚三疏叩闈請卹詔贈太常寺少卿予祭葬有奏疏一卷竹湖遺稿行世

馬一龍字應圖溧陽人父性魯自給諫出知尋甸府以苗變誣繫獄一龍時爲諸生走長安上執政書辭肯悽惻執政憫之歲戊子中順天第一閱二十年至嘉靖丁未成進士由詞林陞南雍司業念母夫人許年高請告歸龍少負才名卓然以文章名世字學道逸

入能品建祠堂置義田一倣於古而剏建尊經閣於
學宮尤爲勝舉有遊藝集行世

鍾遐齡字子宜隆慶戊辰進士出知井陘縣釐剔精敏
深得民心尤以文章擅名分校順天日主司屬搜遺
漏獲一卷已受嗤拙目齡曰此天下士也列高薦折
視乃高邑趙南星果以忠直爲名臣

周晏字叔夜僻處湖東覃思易學遊於金沙從王太史
肯堂深譚名理多所契會尤爲湯儀部顯祖所知所
著易徵修辭取義多會心語世傳之

宋俞棗字祇若溧水人初授承事郎轉起居舍人給事
中極論蔡京誤國謫知潤州改襄陽府鹿門寺有田
千頃歲收租萬斛皆以供僧酒食費棗奏入官助軍
儲一年召赴闕言官吏不率職願戒諭三省選擇監
司俾表率州縣徽宗嘉其言賜紫金魚袋再試給事
中在朝遇事輒盡言帝每嘉納竟以毀紹聖法安置
太平州未幾復起知江寧府子孫後多顯者

劉綰溧水人累官安撫使靖康初死難其後曰應炎者
任臺諫因不附賈似道被謫歸隱不仕

魏良臣字道弼溧水人少遊郡學聞母病亟歸割股以
進初第進士卽詣闕訟陳東寃調嚴州壽昌令以治

最聞召對遷吏部員外郎金人犯高郵擇使講和高宗曰魏良臣有氣節可屬大事遣詣金行成而歸秦檜當國欲畀以言職力辭適金人敗盟奉使兀朮擁精銳懼之良臣辭氣不懾請觀國書曰分淮畫守初議也今欲界長江非使臣所敢知執論久之得從初約檜忌出知池廬二州後檜死召拜叅知政事首請出衣冠之囚歸蠻瘴之冤時軍政廢弛乃核軍實禁工役罷販賈觀聽一新歷潭洪二州卒

吳柔勝字勝之溧水人舉進士第授嘉興教授浙西使者黃灝委以荒政多所全活御史湯碩劾其擅放田租且主朱熹之學不可爲人師改贛縣尉韓侂胄用事黨禁甚厲柔勝獨講學不輟人以此服之時謫宦嶺南者多歿於瘴還過贛妻孥率流落可憫柔勝乃置廣惠館捨閒田所入待之提點刑獄司辟爲屬獲盜當改官柔勝曰豈忍以人命博一官丐祠歸嘉定初授國子正廷對切直未幾知隨州時議和邊將恐以生事獲罪郡人梁臯被北人盜馬追之以弓矢相拒郡下七人於獄柔勝立破械出之隨經兵火柔勝罷科斂寬逋負獎忠義褒死節隨人大悅築隨及棗陽二城招四方勇敢立忠勇軍金人圍棗陽三月不

拔而退諸郡賴之改池州兼知鄂州值歲饑活人甚衆復改太平州鄂人遮道泣畱治太平一年上章請老除祕閣修撰卒柔勝天性孝友與彭龜年楊簡袁燮相師友每以行事至否爲學力淺深之驗嘗曰士以大節爲本大節苟虧他美莫贖故罹黨禍十餘年不變其操贈觀文殿大學士太師魏國公諡正肅子四源泳俱補廸功郎淵潛自有傳

吳淵字道父柔勝子端重寡言苦志力學五歲喪母哀泣如成人舉進士調建德主簿史彌遠館畱之語竟日大悅曰君方爲國器至官嚴幹有聲江東九郡冤獄咸訴使者乞送淵申雪改差河東制置使幹辦公事丁父憂詔起復力辭且貽書政府力言其非時史嵩之方奪情或曰得無礙時宰乎淵不顧詔從之服闋累官寶章閣學士知太平州兼江東轉運使兩淮民流徙入境者四十餘萬淵亟爲優恤使主客相什伍無敢犯由是獨獲濟以功加華文閣直學士工部尚書改知隆興府兼安撫轉運副使歲大侵講行荒政全活者七十八萬尋提舉南康節制斬黃等處峒寇擾亂攻破數縣淵命將擒其渠酋亂平遷兵部尚書知平江府兼浙西兩淮發運使歲亦大侵淵所全

活復不下數十萬進端明殿學士沿江制置使朝廷
付淵以光豐斬黃廼劾三大砦二十二小砦團丁壯
分隊伍星聯碁布暇則耕有寇則戰屹然爲一方保
障詔嘉其功拜資政殿大學士參知政事卒贈少師
謚莊敏淵有材略尚氣節所至興學養士著有易解
及退菴文集奏議

吳潛字毅夫淵弟舉進士第一授簽鎮東軍節度判官
紹定四年都城大火潛上疏累千言勸理宗修省以
實闔宦勿親女寵勿昵嬖召賢哲選用忠良毋竝進
君子小人以爲包荒毋定容邪說正論以爲皇極庶
幾彌災爲祥易亂爲治又貽書史彌遠論六事遷大
府少卿淮西總領又告執政論用兵復河南不可輕
易金滅則與蒙古爲隣法當以和爲形以守爲實以
戰爲應六年除太府卿知建康府首奏以趙剌事例
并諸司問遺例冊錢代納江東一路折帛次論金元
興亡本末甲午和戰非宜又論進取有甚難者二事
後皆如其言除秘閣修撰兼知隆興府奏言諸郡兵
荒乞下本路一體蠲征復屢論計畝納錢和戰成敗
大計襄宜亟救備不可闕乞養宗子以繫國本皆切
時務理宗頗嘉納之尋同知樞密院兼叅知政事入

對言國家之不能無弊猶人之不能無病今日之病不但倉扁望之而驚庸醫亦望而驚願陛下篤任元老以爲醫師博采衆益以爲醫工使臣輩得以効牛溲馬渤之助淳祐十一年拜右相明年以水災乞解機務又四年授沿海制置大使判慶元府條具軍民久遠之計達於政府奏時務行之又以餘錢代民輸前後所蠲五百四十九萬以久任丐祠乞歸未幾召拜左丞相會元兵渡江攻鄂州別將由大理下交趾破廣西湖南諸郡潛上章言奸臣誤國又論丁大全沈炎等罪卒爲炎所論落職循州安置潛預知死日語人曰吾將死矣夜必風雷大作已而果然德以元追復原官潛平生篤義有經濟大志立朝忠亮剛直議事皆出於正惜用之弗究云

王景雲字仲慶溧水人生而穎異及長學問宏博咸淳間以薦辟授清流簿與弟景華嘗捐貲周恤貧乏建怡怡亭宴樂至老不忍析居副使劉應昂爲撰墓志銘謂雲家有田氏紫荆之義云

元趙龍澤字萬里溧水人父鑑尚義業儒以薦授江西行省都事追封句容縣男龍澤爲人剛果有幹蠱才授雷州清道寨巡檢侍養不仕時汝穎兵起攻陷建

江寧府志 卷三十三
康龍澤不屈而死贈浙東宣慰使司都元帥府照磨
子權亦從父死弟雷澤與其子楷家居亦遇害

明端木復初字以善溧水人元至正中四方兵動東南
尤甚復初爲海右憲史言時政之急如此則可守如
此則可戰否則必敗時人不能聽遂棄去洪武初以
薦辟爲徽州府經歷徽郡田賦久不均復初建局城
東使民自實田集爲圖籍覈盈朒驗虛實而定科繇
由是民無逋租官無橫斂改吉州通判磨勘司丞陞
爲令勾稽隱伏人不敢欺後爲刑部尚書用法本諸
律而持以平恕老於議法者咸以爲允出爲湖廣行

中書省參知政事卒子孝文

齊泰溧水人初名德洪武二十年鄉貢明年舉進士歷
禮兵部主事會雷震謹身殿上禱郊廟泰以官九年
無過得陪祀賜名泰三十年陞兵部左侍郎明年進
尚書上嘗召泰問邊將姓名泰歷數無遺又問諸國
圖籍泰出袖中手冊進簡要詳密上因奇泰是年閏
五月受顧命輔皇太孫時諸王皆尊屬擁重兵專制
地嫌勢逼詔諸王臨邸中毋奔喪王國所在吏民悉
聽朝廷節制詔下諸王不悅謂此齊尚書間我也成
祖時自燕入臨至淮安泰言上急出勅符勒歸國嘗

奉使燕邸燕邸厚賂之泰受而歸請爲兵費建文君奇其識日益倚重泰憤宗戚權重與太常卿黃子澄建策凡親王罪輒除國泰欲先圖燕黃子澄不可建文元年燕師起泰專主籌畫命將出師建文君詔闔外事一付泰泰遂移檄指斥削屬籍燕師以誅泰爲名疏請發奸臣齊泰黃子澄等與臣訊究時遣李景隆將兵北伐泰極言其不可任三年燕師日進逼淮泗謫泰與子澄官求解兵文皇曰此緩我也不聽進兵益急尋召泰未及還金川門開建文君遜去泰追至廣德欲往他郡起兵興復被執見成祖不屈死之籍九族有子甫六歲給配仁宗時赦還鄭端簡公見其六世孫光裕卽此兒後也嘉靖中知縣謝廷蒞爲祠祀之

端木孝文溧水人尚耆以善子與其弟孝思皆以儒士起家孝文爲翰林待詔孝思爲翰林侍書初孝文使朝鮮鮮人重其才欲有厚贈問端太史行李何在孝文曰吾持一節來耳請惟以一節還無何孝思復使朝鮮以冰檠勉之孝思拜受而去後亦惟以一節還報朝鮮榮其事爲立雙清館

魏澤字彥恩少有學行洪武中官刑部尚書建文時謫

爲海寧尉時文皇逮方孝孺誅及族黨孝孺幼子德宗甫九歲澤極力覆護台州秀才余學夔寓於京心知之遂潛歸變形佯狂乞食於市一日迂澤於城隅作狂歌有願効程嬰語澤會其意叱曰扶顛子出城去兩日後復遇在市歌如前澤乃密致孝孺文稿及德宗於學夔囑使急去以故孝孺尚有後謝文肅所稱孫枝一葉者是矣後直指黃紀賢代巡至溧建石碑于北門橋表澤大義

趙本字居仁溧水人生而穎悟長以德行聞洪武間以薦辟歷官左通政苦節自勵家無蓋藏其係往者之給錢二貫令徒步歸永樂間治水浙江居仁患之艱哉斯役也人成之而湖毀之徒使吾民死板築已耳以文請於海神潮果弗至者三日而功成

張彥彭溧水人永樂間歷官河南道御史清慎持憲成祖賜金牌百面文曰赤金十分舉朝榮之

丁沂字宗魯溧水人弘治壬戌進士授南京刑部主事歷郎中門無私謁獄無怨辭擢湖廣按察司僉事董造榮府常德之民賴以不擾賑湖湘饑全活甚多進浙江副使嘗治水田賦獲利轉叅政至布政都御史所在吏畏民懷卒於蜀

武尚耕號晴川隆慶辛未進士歷官湖廣左布政先爲四川叅政值洞蠻之亂征討有功勒勲於峨嵋山石居平清介不受一錢及歸田仍守布素三子在侍體無完衣以是清名大著

武化中字大治萬曆巳酉舉人授黃陂令邑故難治多豪強化中摘伏得渠而民安嘗因旱步禱有應簡南道御史未任卒

施一鼇字士選生而穎異幼喪二親哀毀廬墓時以孝聞由恩貢司訓貴池陞授沔陽州學正時閣臣楊嗣昌辦寇於楚委署州篆詰戎治賦有聲州有里大坑廣四十餘里內田一萬三千餘畝因襄水衝破口岸幾三十年無能塞者一鼇令聚船百隻沉底隨折破房百間排架聚土高築三月堤成民間感戴年八十四卒

劉鳳池生有氣節與人無欺長齋少嗜欲年始三十有一聞甲申之變作遺言付子六斤爲治命從容赴水死家人跡之見其衣冠整然立於河中面貌鬚髮猶生邑人多爲詩文以吊之

大清李蔚號鍾山溧水人順治丁亥進士父應科慷慨能緩急人多義之蔚初仕大行三奉使辛卯分校順

天陞工部權稅南關奉紀錄以病請告卒於家

甘霖字沛之高淳人清介慈和才情敏給鄉黨重之

洪武二十九年以薦召入高皇帝見其狀貌異之間

其名曰甘霖因曰浙江大旱汝往霖之授左叅政以

六月至其夜夢神告曰某地有泉可濟民渴旦往儼

若夢境掘之果得大泉同僚屬祈禱大雨隨至歡聲

四起居二年以病乞歸永樂初靖難師至錄舊績擢

江西布政使體國愛民始終如一五年卒賜葬官歌

周慎字尚禮高淳人父卿好施濟慎爲諸生受餼每舉

所入奉之由歲薦入成均有京兆公某者贈之二十

金會歲歉見道有流亡骨骸者卽賑之比抵家僅餘

數金適隣人將鬻妻復傾囊助之謁選授蘄水令政

尚簡易務持大體釐積弊申誣枉而勵以清操會入

計筭無餘資士庶醵金以贈一切謝遣至濟寧旦起

整襟端坐而逝蘄民立祠祀之

韓邦憲字子成高淳人少以奇童稱年十八中嘉靖己

未進士授屯田主事佐理大工絕中貴人侵冒及管

承陵有功晉虞衡員外郎丁艱歸居三喪致哀盡禮

時邑令丈田邦憲爲之區畫事宜遂成丈量良法淳

邑官田硤瘠糧重乃以已戶民田均之以分其糧豪

右不能違先是邑田沒於湖而賦役外復加里甲物料虛懸米八千石大爲民困邦憲倡減稅議兩臺題請得永除米八百六十石由是應天尹改里甲入均費八縣同之皆頌其德遷衢州知府問民疾苦首陳明大義明職守實節省復成法議賦役講實政廣儲蓄修武備八事而尤以教化風俗人才爲先稽孔氏廟田捐俸養士定賦役之書革織造之姦還寄運之艘增防鑛之兵加開化之鹽引至今爲衢永利病劇值大旱猶強起書檄發粟賑濟及將卒惟惓惓百姓是念語不及私云著有韓衢州集

陳九思字福之高淳人慷慨秉正不競榮利淳邑

糧重鬻者僞作民田田去糧存逋積逃竄弊極甚嘉靖戊戌思當歲薦挺身言之不避豪右巡撫歐陽移檄勘量盡除虛米貧富以均初令新鄉改令靈川均有惠政乞歸析產悉讓伯季鄉里敬之

張應望字汝尚一字凝益高淳人其先出汴州祖宗道始遷居焉應望萬曆壬辰進士授烏程令素有鋤強扶弱之志邑范董兩氏僕橫甚爲民害守土之吏莫敢致詰應望悉其狀捕執渠惡廷理其不法事百餘狀申請兩臺司成范應期懼奏聞投繯死妻吳氏伏

闕誣奏緹騎逮望坐以戊世咸稱冤望毫無嗔恨以
得行其志爲樂久之遇覃恩赦歸閉戶著書怡然自
得熹宗朝追贈尚寶少卿

韓一光字季孚高淳人登崇禎戊辰進士授行人奉詔
冊封以沿途交際一切謝却癸酉考選河南道御史
聲震京師豪貴戒不敢犯御書其名於屏大圈者三
乙亥代巡四川力禁投獻與宗藩忤嚴革舖役坊州
一案保全諸生數十人以先巡視東城時以執法忤
主師意遂爲所劾外轉浙僉事歷陞山東副使告歸
淳邑錢糧以民解受累一光言之於官令官徵官解
民困永甦淳自破圩折田以來賄墊虛糧苦無下
議行改折光具書大司農党公極陳利病遂獲永折
其力甚鉅年七十有六終

柳江字朝宗由歲貢授滿城令有惠政以艱歸後補石
城奏績調寧津有罹死辟者江知其冤白之當道得
釋其人報以數百金不受繪像祀之居家清約不異
寒素人問曰作令三邑田不滿百何也江曰多田多
人多人多費不如少也至今稱之

唐張籍字文昌烏江人第進士爲太常寺太祝次遷祕
書郎韓愈稱其文多古風學有師法沈默靜退光映

儒林遂遷國子博士歷水部員外郎主客郎中一時名士咸與之遊性狷直不阿私人嘗責韓愈喜博筆爲駁雜之說論議好勝人排佛老不能著書若孟軻揚雄愈亦屢書荅之仕終國子司業籍爲詩長於樂府史稱其能自名於時云有集七卷

宋張邵字才彥烏江人籍之六代孫也登宣和三年上舍第爲衢州司刑曹事會求直言邵上疏請進都金陵以圖恢復金人南侵詔求可至軍前者邵慨然請行假禮部尚書充通問使卽日就道至濰州接伴使置酒張樂邵曰二帝北遷邵爲臣子所不忍聽請止樂翌日見左監軍撻覽不拜且以書抵之曰兵不在強弱在曲直僞楚僭立羣盜蠡起曾幾何時電掃無餘是天意人心未厭宋德也今大國復裂地以封劉豫窮兵不已曲有在矣撻覽怒執邵囚於祚山砦明年又送邵於劉豫使用之邵見劉豫長揖呼爲殿院責以君臣大義詞氣俱厲豫怒械置於獄知其不屈復送於金拘之燕山僧寺作書與金言劉豫挾大國之勢日夜南侵不勝則首鼠兩端勝則如養鷹飽則颺去終非大國之利金取其書去益北徙之紹興十三年和議成放之南歸陞秘閣修撰左司諫詹大方

論其奉使無成改台州崇道觀移書時相勸其迎請
欽宗與諸王后妃十九年以敷文閣待制知池州再
奉祠卒邵遇事慷慨常以功名自許出使囚徒屢瀕
於死其在會寧金人多從之學有文集十卷子孝覽
孝曾孝忠孝曾後亦以出使歿於金金人知爲邵子
尚憐之孝忠登隆興元年第官至直寶謨閣知金州
事兼制司叅議

張孝伯邵從子登隆興元年第任江寧知縣訪求民瘼
奏停年租額外徵辦大水民饑詔賑卹建康之被水
者孝伯爲經理官得其所累遷叅知政事未幾罷
韓侂胄當國孝伯勸弛僞學禁復故相趙汝愚官
時賢人貶斥者得漸還故職

張孝祥字安國直祕閣祁之子以孝廉稱讀書一過目
不忘下筆頃刻數千言紹興二十四年廷試第一時
策問師友淵源秦墳與曹冠皆力攻程氏專門之學
孝祥獨不攻考官已定墳冠多士高宗讀墳策皆檜
語諭宰相曰張孝祥詞翰俱美於是擢孝祥第一而
墳第三授承事郎簽書鎮東判官秦檜聞之怒旣知
孝祥乃祁之子祁與胡寅厚檜素憾寅孝祥又拒曹
泳請婚泳憾之於是諷言者誣祁有反謀繫詔獄會

檜死以孝祥爲祕書省正字初對首言乞總攬權綱以盡更化之美又言官吏忤故相意並緣文致鍛鍊成罪乞令有司改正又言王安石作日錄一時政事美則歸已乞詳正黜私說以垂無窮從之遷校書郎芝生太廟孝祥獻芝原以大本未立爲言且言芝在仁宗英宗之室天意可見乞早定大計遷尚書禮部員外郎尋爲起居舍人除知撫州年未三十蒞事精確老於州縣者所不及孝宗卽位復集英殿修撰知平江府事繁劇孝祥剖決庭無滯訟屬邑大姓並海囊橐爲姦利孝祥捕治籍其家得穀粟數萬明年吳中大饑賴以濟張浚自蜀還朝薦孝祥召對乃陳康以來惟和戰兩言遺無窮禍要先立自治之策以應之復言用才之路太狹乞博采度外之士以備緩急之用帝嘉之除中書舍人尋除直學士院兼領建康留守金再犯邊孝祥陳金之勢不過欲要盟宣諭使劾孝祥落職復集賢殿修撰知靜江府廣南西路經略安撫使治有聲績再知潭州爲政簡易時濟以威湖南遂以無事復待制徙知荆南湖北路安撫使築守金隄自是荊州無水患置萬盈倉以儲諸漕之運請祠以疾卒年三十八孝宗惜之有用才不盡之

歎孝祥俊逸能文章工翰墨嘗親書奏劄高宗見之
曰必將名世且蚤負才俊蒞政揚聲史臣尤嘆息焉
有集四十卷

明張瑄字廷璽一字古愚晚號安拙翁世爲江浦縣人
正統間爲縣學生中辛酉鄉試明年登進士授刑部
主事歷陞江西吉安知府吉俗尚鬼刻木像神迎祝
之禁之弗聽遇諸途叱令棄像水中寘首倡者于法
郡大饑申上司不候報發廩賑之全活甚衆郡諸生
有匱乏者輒分俸給之又建閣于學以藏御書建祠
於郡以祀忠節天順中陞廣東右布政會廣西流賊
越境攻破屬邑晝夜躬督官軍擒殺之不憚艱險同
列歎其忠勤又躬督各屬造預備六十二處修理陂
塘圩岸四千六百六十六處修築廣州新會等府縣
城垣一十二處成化中轉左布政使巡撫鎮守等官
交章薦瑄德行才識剛方仁惠乞留任以慰民情詔
可無何陞都察院右副都御史巡撫福建時郡邑久
無糧儲瑄命建倉廩勸民出粟以備凶荒海寇如林
壽六魏懷三等山賊如葉旺春等瑄皆區畫擒斬境
內以安朝廷賜勅稱其處置得宜改巡撫河南風紀
益振改運倉于漳德水次軍民稱便入覲奏論時宜

若安插流民責成守令修舉武備甄拔滯才等一十八事悉皆施行歲大飢發廩賑濟設粥以給飢者出衣布以給寒者活民不啻萬數晉南刑部左侍郎尋陞本部尚書年七十有一謝事家居天性儉約居官幾五十年自奉如寒士吉安闕廣皆立石以紀功德所著有香泉稿粉署餘閒稿凝清集閩汴記巡錄南征錄安拙類稿若干卷弘治甲寅秋卒於金陵之里第

莊杲字孔陽江浦人舉進士授翰林檢討與羅倫陳獻

章友善成化二年元宵放燈命史館賦詩杲與同官章懋黃仲昭上培養君德疏謫桂陽州判官給事中

毛弘御史陳壯論救改南京行人司副久之以艱去不起居定山垂三十年以後軍都督府周廣榮薦召用巡撫何鑑入定山勸起之謁部長揖尚書耿裕優禮之大學士徐溥謂當復杲翰林丘濬沮之仍司副遷南驗封郎中得風疾明年乞告歸所著有定山集杲性豪邁多奇蚤著直聲以道自任持身慕伊川矩度接人慕明道和氣晚乃應召而出非其初志云丁毅字德剛江浦人少喜讀書尤精醫業嘗獲遺金咨其人還之任邑訓科率夫役採蘆時有虎患毅為文

祝神以身率先虎遂引去後取署本府正科屢委勸事不受私謁操履廉慎爲人所推

嚴紘字仲周江浦人受業定山莊先生門父早逝歲時悲悼不忘事母備極孝養登弘治壬戌進士授歸安知縣仁明廉介擢陝西道御史疏劾逆瑾幾被中傷守南昌極辨宸濠非制喬莊簡公力爲推引兵備九年縣民困於欽騎馬毋江稅衛人困於月銀白當事者悉祛其弊他無所干謁壽九十有四集有石巖二

體詩

丁明登字蓮侶萬曆丙辰進士仕至衢州知府有政聲築園烏龍潭旁極其幽勝好善樂施著述甚多大約勤懲引掖有裨世教人爭傳誦明登子雄飛字菡生博學好義傲雲棲功過格聯社力行每朔望率諸友焚香告神以交儆焉積書數萬卷每出必擔簾囊載圖史以歸所著不啻百種

晉王鑒字茂高崇邑人少以文筆著稱初爲晉元帝琅邪國侍郎時杜弢作逆鑒上疏勸帝親征詞旨剴切帝深納之卽命中外戒嚴會弢平乃止中興建拜都尉奉朝請出補永興令大將軍王敦請爲記室叅軍

未就而卒時年四十一有文集行於世

唐陳融六合人幼有至性奉親以孝友聞與人言若不
出諸口尤以禮法自檢其遊止皆有常處鄉人無賢
不肖皆敬之不樂仕進閉門誦讀博洽爲當世最卒
諡貞晦先生東平呂溫作記表之

張約之崇邑人性耿介不阿授吉陽令時朝議將廢廬
陵王爲庶人約之上疏極諫不納遂見殺論者以爲
有田延年之風

宋仇著崇邑人仕至朝散大夫知梓州子博年十三作
至樂堂記蘓軾見其文奇之

李可六合人咸淳間爲監察御史與御史陳過論賈似
道黨俱貶斥朝論快之

明楊洪字宗道六合人祖政漢中百戶洪嗣官調開平
機變敏捷善用計出奇兵搗虛或夜劫營累功陞都
指揮正統元年内臣韓政阮鵞疏洪短上詰二内官
曰此必小人左右汝卽械至京姑貸汝二人時洪頗
爲衆忌上又每舉洪功勵諸將洪益自奮守邊屯營
專用鐵蒺藜尋以都督守獨石所在有功充總兵鎮
宣府敵人畏之呼楊王土木之變車駕道宣府北狩
去洪閉城門逮繫詔獄是年十月出洪獄中自効洪

與孫鏜范廣等率兵戰輒大捷進侯洪爲將紀律嚴明將士用命敬慎自將不敢專殺宣德正統景泰間稱名將也先之難奮不顧身一時諸將功爲最景泰二年還鎮宣府卒贈穎國公諡武襄子傑嗣侯言臣家一侯二都督諸蒼頭得官旗者十六人乞停蒼頭職役許之未幾卒

陳達六合人世襲忠義衛指揮同知景泰初被薦陞都指揮僉事鎮守通州等處督捕盜賊累進都督同知守備倒馬關通州軍人保留之成化中卒達爲人沉鷲有謀正統初有詔五品堂上官舉將才學士李士奇勉其之得出入其門下聞所未聞故蒞軍行事多有可取天順初于謙被誣遭極刑是時羣凶氣焰可畏達獨收謙尸爲之斂葬君子多其義云

楊能字文敬洪從子世開平指揮使己巳之變拔爲將驍雄善戰有功陞都督同知景泰初總兵鎮宣府與李秉共事天順元年陞都督仍充總兵鎮宣府援大同有功遂封武強伯食祿千石四年卒無子父休乞以能弟倫嗣伯得世指揮使

楊信字文實幼武勇以功由指揮僉事歷陞督府僉事充叅將再守懷來協守宣府移鎮延綏屢立戰功封

彰武伯總諸鎮兵嚴烽火謹斥堠相機設伏多建奇績卒贈侯諡武毅

黃肅字敬夫六合人成化戊戌進士授河南新鄭知縣賑濟飢民多所全活陞工部都水主事嘗管理泉開與修河工進刑部員外郎擢廣西按察僉事部內士官趙源妻岑氏以賄謀立假子肅倡義竟立其姪士官黃紹反肅率兵討之其子被誅紹尋以憂死思恩知府岑濬謀作亂豫築丹良城以截行舟肅曰是賊咽喉也卽被甲先登士皆蟻附賊遂焚營壘全師以歸東塞蠻叛肅從間道破其巢蠻潰撫按交章薦之尋進湖廣兵備副使猶上言廣右事宜七款朝廷多見允行正德初以軍功陞三品致仕嘉靖壬午甲申奉恩詔進階二品有司存問其門壽八十六卒

黃宏字德裕六合人弘治壬戌進士任萬安知縣擢戶部主事以便養改南京刑部進祠祭郎中轉江西叅議九江盜起凌閔之黨甚熾聞宏往走西山實據寧濠上世之墓莫敢兵也宏襲之夜遁擒其孥明年濠舉兵率羣盜以叛先陳壽宴兩院三司畢至明日期往謝首殺都御史孫燧按察副使許逵一時迫脅者多得釋宏不服以手械向柱蹙項死之暴其屍數日

逆黨劉養正請具棺後濠誅贈宏太常少卿祀于旌忠祠

王弘字叔毅廣洋衛人弘治癸丑進士夙負天才弱冠舉禮記第一定山莊先生杲愛而妻之畱神理學以名節自砥礪授行人擢南道御史論列逆瑾罪狀忤旨被逮杖發爲民瑾仍矯榜姦黨于朝堂弘與焉瑾誅起廣東僉事進副使嘗攝學政拔霍宗伯韜倫司成以訓于生儒中在廣數暮糾貪吏祀先儒風采凜凜值江右海南徭寇蜂起隨相機擊走之以論時相之子重獄爲所中而歸嘉靖初有援引出議大禮者弘不附名士尤高之所著有巴山集

汪元哲字魯生萬曆庚戌進士工詩文能書畫官戶部郎出守衢州性廉惠有淡靜稱子國溫亦工詩畫廬墓終墓側

孫拱辰字子極六合人舉萬曆己卯經魁閉戶讀書授生徒從學甚衆授撫州推官丈量屬縣樂安田矢公矢慎不阿權要諸所隱占犁然一清大司寇董公裕爲之記移守臨清時稅璫煽惡惑方士言殘嬰兒爲藥餌辰指名揭治其罪值歲大祲殫精賑濟又借築城修學之役興工給食而活饑民甚衆薦山東循良

第一爲璫黨所中罷官

吳嘉禎字源長先世吳人父宗周賈于浦子口因家焉
禎性篤孝母病劇割股和藥而母愈登崇禎丁丑進
士授戶部郎筦通州倉搜剔隱弊條請清除倉中陳
米腐朽積久無用禎令民役之有罪者量其輕重罰
令簸揚得糧近七萬奉旨紀錄念徵輸困民因覆省
臣疏議捐崇禎十三年以上舊逋凡一千一百三十
萬有奇開復降革守令千餘人大農疏上皆得請陞
閩泉州叅議有豪貴子謀占人產繫之獄禎重懲其
僕而釋繫者勢宦立私稅于洛陽橋禎白兩臺董之
追贓立碑商賈誦德特境內多盜禎撫勦並用殲渠
散黨歸農者二千七百有奇會遷粵西以病請歸囊
橐蕭然往來洞庭匡廬之間漁樵爲侶詩酒自娛不
問戶外事病痿二載手不釋書臨革命子曰石火電
光萬事無久常者謹遵祖訓勿妄勿欺勞謙貞吉一
語終身誦之可也踰日瞑目端坐而逝年纔五十有
七

談王道字對揚六合人崇禎己卯以歲薦爲新鄭訓導
時歲大稜道爲粥糜偕其長子躬哺之存活甚衆辛
巳冬環河之城俱爲賊陷新鄭孤壘無援知縣劉之

暉得痠病道協民城守不避矢石環攻不下賊以五牛拽紅彗大砲攻之城應聲碎道猶踞守城東連被數矢墜城寇獲道索印道詈曰此朝廷家物賊欲何爲賊怒殺之

馬純仁字樸公邑庠生崇禎甲申聞國變題詩于衣帶投河卒



孫國教字伯觀原名國光拱辰子幼穎異善屬文爲大中丞周公乾教所重嘗遊吳門至京口遇老友錢次甫爲盜所劫傾囊贈之卜滁冶二水間置五一菴以貢特授中書舍人國教書淫傳癖鑒賞最精四方碑板法書賈京師者必先投國教訂之居金陵小館近廟市時董公思白爲大宗伯每過市必至教寓中繙閱竟日一時勲戚之賢者如恭順吳公惟英新樂劉公文炳都尉冉公興讓鞏公鴻圖皆禮賢下士篤嗜詞翰咸以牛耳推國教月供膏火費著燕都遊覽志四十卷雞樹館詩文集讀書通藏書通若干卷乞假歸老年六十有八子宗岱亦能詩文投筆爲偏將軍晚年隱居賣藥有古人風

論曰嘗稽秦漢而上大約卿材萃于齊晉學士盛于鄒魯智勇歸于燕趙而金陵僻在南服無所著聞豈

非昌明之運尚有待哉孫吳建國而多士景從典午
渡江而羣賢畢聚一時文章事業熊熊旦旦媲美中
土矣唐宋以來代有哲人大約生此土者鍾以蔣茅
靈秀之氣故其人多廉靖而好義盪以江淮浩瀚之
觀故其人多才智而立功沐以王謝支許之風流餘
韻故其人多博雅而弘通縉紳之士家無餘貲韋布
之儒身無擇行此真禮義之鄉而君子之強所願託
處者也雖消息靡常故家世族多化單門而其皎皎
自好卓犖不羣之概猶有先民典刑焉詩云高山仰
止景行行止服前疇而戒鹵莽繼往哲而佩荃蘅其
在人乎其在人乎



江寧府志卷之二十三終



海登原志
卷三

